



D'Saison 2000/2001 ?

do war dach eppes

- D'Rouh vun der Summervakanz hat nëtt ganz lang ugehalen , well schons den 19ten September 2000 hun sëch d'Cheffen getraff, fir an enger **éischter Réunioun**, Iddien auszetauschen an d'Weichen fir déi nei Saison ze stellen.
- Samsdegs den 23te September huet de Carlo zu Munneref Kontakt opgeholt mat de Propriétaires vun engem eidelen **Hais'chen zu Altwies**, dat do am gangen war ze zerfaalen. De frëndlechen Accord vun de Propriétaires erméiglecht et eis, dëst Haus fir, a mat de Pionnéier ze restauréieren. Sou hun mir 2 Problemer an der neier Saison geléist, D'Pionnéier an déi aner Branchen sinn raimlech getrennt fir hir Versammlungen, (waat am Home nëtt méiglech ass), an déi handwierklech Arbecht gëtt eise Pionnéier fir e gudde Strapp eng sënnvoll Beschäftegung an huet och en neien Corpsgeeschts opkomme gelooss.
- Dat neit Scoutsjoer 2000/2001 ass agelaut ginn mam **LGS Kongress** an dem **Cheffdag**, déi den 23ten a 24te September 2000 zu Suessem ofgehalen goufen. Eng grouss Delegatioun vu Cheffen aus alle Branchen war vun eisem Grupp derbei, fir gewuer ze ginn, waat vum Verband Neies ze erwaarden wir.
- Den 3ten Oktober 2000 hun mir den Explorer a Pionnéier Rendez-vous ginn, fir mat enger **éischter Versammlung** viirsechteg an déi nei Saison eranzeluussen.
- Sondes 8ten Oktober hun mir eis un de Feierlechkeeten vun der "**Journée de Commémoration Nationale**" bedeelegt.
- Dëschdegs de 15ten Oktober hun mir zu Duelem beim Paschtouer an der Garage **Viiz** gekeltert.
- Samsdegs den 14ten Oktober 2000 war **Montéesweekend** am Grupp. Während mëttes am Buchholtz, 6 Wëlfcher hir Montée bei d'Explorer mat enger Seelbunn gemacht hun, waren nuets 5 Explorer op engem "Prä-Halloween-Tripp" an de Bëscher beim Scheierbiereg ënnerwee fir hir Montée bei d'Pionnéier ze erzidderen. An der Yurte ass de klenge Rescht vun der Nuecht um Scheierbiereg op en Enn bruecht ginn.
- Den 24ten Oktober hun d'José, de Steve an de Carlo eng **Gruppecheffsformatioun** ugefangen, fir eisem Grupp endlech nees en offiziellen (3-fachen) Gruppecheff ze verschaaften.
- Sondes den 29ten Oktober hun d'Pionnéier en 1ten Asatz gemaacht, fir zu **Altwies an hirem Hais'chen** mat den Arbechten unzefänken. Wann een bedenkt, datt dat Gebai bal 30 Joer eidel stung an den Dag beschiedegt war, kann een sech denken, datt e grousst Stéck Arbecht virun ons louch. An de kommende Wochen a Méint waren mir duerfir muenche Samsdegmëtteg op eisem "Chantier".
- Freides de 17ten November waren eng Delegatioun vun 5 Cheffen vun eisem Grupp zu Stengefort um **AVEX-Chefftreff**. (déi mussen awer och iwerall siin wou eng Kaatz geschleeft gëtt°
- Ab dem 25ten November sinn eis Pionnéier offiziell ageschriwwen an d'Partizipatiounslëscht vum "**mérite jeunesse benelux**" mam Objektiv, dësen Hierscht bei der remise vun den Auszeechnungen , och Memberen vun eisem Grupp am Palais derbei ze hunn.
- Samsdegs den 2ten Dezember huet de ganze Grupp op Commande **Adventskränz** gebastelt. Eis Grouss Scouten hun d'Duelemer Krëppchen op Elleng bruecht, an se do fir **d'Krëppenausstellung** opgebaut.
- Den 18ten Dezember hun mir dann nees d'Krëppchen zu Elleng ofgeriicht an se zu Duelem an der Kiirch opgebaut.
- Den 19ten Dezember owends sinn mir mat 22 Leit op Merl gefuer fir bei der Veillée derbei ze sinn, an **d'Liicht vu Betlehem** mat an eis Poren ze bréngen.

- Samsdegs den 23ten Dezember hun mir no der Mass e **Foustour** duerch d'Wanternuecht vun Elveng op Duelem gemacht. D'Friddenslicht vu Betlehem huet eis an de Lanteren begleet, an huet duerno den Home heemlech erlicht, wéi mir eis d' Spaghetti zur **Krëscht dagsfeier** gutt schmaachen gelooss hun.
- de 24.12.99 op helleg Owend sin mir an e puer Equippen ënnerwee gewiecht, fir d'**Friddenslicht** vu Betlehem an e puer Kichelcher, déi d'Scouten matbruecht haten, u Mënschen ze **verschenken** déi al , krank oder eleng waren. Sou hun mir e wéineg richteg Krëscht dagsfreed konnten bréngen an erliewen; domat war d'Joer 2000 fir eis zu Enn, op mannst bis de 5te Januar 2001, wou mir mat 2 Branchen op de Wantercamp gestart sinn.
- Freides de 5te Januar sinn d'Explorer mat Bus an Zuch op Kayl gefuer. **Horror am Wanter** sollten sie , als Ofschloss vum Thema vun hiren Versammlungen do erliewen. Op sie domat d'Wieder gemengt haten? Jiddenfalls hun sie an den 3 Deeg zu Kayl e ganze Koup opweises gehat, en Horrortrip als Nuetsspill, en Dagesgeländespill, eng Horror-veillée (sou schlecht war déi dach guer nëtt), eng Rëtsch Starten déi vun den neien Explorer geholt goufen, an e puer Cheffen, déi der Verzweiflung nô waren. Do derniewt, haten sie awer och d'Iddien an eng Rëtsch Dialoger zesammenphantaséiert, déi mir dunn als Theaterstéck konnten zesammenhänken. Zur selwechter Zeit wollten d'Pionnéier op Wies bei d'Bud zelten goen, fir dann um Bau ze schaffen. Mais d'Wieder huet eis schnell dervun iwerzeegt, besser e festen Ënnerdag ze sichen. Déi al Schoul zu Fëlschdrëff, huet eis dun opgeholt. Trotz dem Sauwieder hun mir awer eng Reih Progrès'en gemacht. De Buedem vun der ënneschter Stuff ass zB ganz erneiert ginn, an och soss huet muenches Stullgang kritt.
- Dënschdegs den 16te Januar, no de Versammlungen haten mir eis **éischt Generalversammlung** als Scouten. D'Mme Buergermeeschter an eng Reih Leit vum Gemengerôtt hun duerch hir Präsenz bewisen, datt sie sêch duerfir interesséieren, waat bei de Scouten leeft.
- Muenchen Samsdegnomëtteg an souguer an der Fuesvakanz hun fleisseg Hänn zu Wies gewerkelt. An den 1te März, no enger Teaterprouf hun mir déi éischte Kéier **zu Wies** beim Uewen op eise Couchen gelé'en ze schnëssen an eis wuelzefillen. D'Arbecht huet ugefang Profit ofzwerfen.
- Op Buergsamsdeg, 3te März haten mir eis Rendez-vous zu Duelem beim Home ginn. **Faakelenbau'en** stung um Programm, fir owens zu Fëlschdrëff bei der JAC um Buergbrennen ze verkafen an sou e flotten Fakelzug bei d'Buerg ze erméiglechen. Ganz niewebe bei hun mir och nach d'Invitatiounen fir eisen Teater ënnert d'Leit bruecht.
- Den 10ten an 11te März war et dann sou weit. Den dramaturgeschen Héischpunkt vum Joer, den **Teater vun den Duelemer Scouten** stung um Programm. D'Augustkiischt vun de Wëllecher an "Dréih kee Film" den Avex hirt Stéck ënnert Mathëllef vun de Pionnéier, an och d'Sketcher vun de Pionnéier haten e groussen Applaus. Mais och eis Amicale, déi hiren éischten groussen Asatz nom Réckzug vun der Famill Thill haten, hun sêch gudd aus der Affaire gezunn, an de Raym, eisen neie Finanzminister hat en zefriddent Laachen am Gesiicht. (?? !!!!!)
- Dënschdegs nom Teater, hate mir e relaxe Programm. Mat allen Würden a Leid-träger vum Grupp hun mir den Erfolleg vum Teater an den **8te Gebuertsdag** vun eisem Grupp mat Buffet an Dessert ausgiebig gefeiert.
- Freides de 16 März hat eis Explorerchefféquipe en **éischten Rendez-vous** mat der Dikkrecher Chefféquipe fir de Summercamp zu Kalber ze bespriechen.
- Den nächsten Dag owends hun sêch Cheffen an Amicale zu Duelem bei Ern Rendez-vous ginn, fir bei engem gudde Maufel d'Arbecht vum lëschte Joer ze feieren, a Schwonk ze huelen, fir déi nächst Projét'en, déi schon virun der Diir stungen.
- Sondes den 31te März waren mir mat enger stattlecher Délégatioun zu Wallefer an der Schwämm beim **Splash 2001** derbei. Scouten aus alle Branchen vun eisem Grupp sinn matgeschwommen, fir datt hir Sponsoren fir eng gutt Saach hu missen berappen. D'Ra-RO hun déi Suen gutt ugeluegt bei hiren Asätz a 4 arme Länner op 4 Kontinenter. Alle Bedeelegten en häreleche Merci.

- Den 3ten Abrëll hun AVEX A PIO'en **eng B.A. un eiser Duelemer Kiirch gemaacht**. An der Versammlung hun mir d'Bänken d'Teppecher an d'Biedem, déi bei den Renovatiounsarbechten stark verdreckst ginn waren, gebotzt.
- Donnegdes de 5ten Abrëll hun mir Scouten, mat de Fëlschdrëffer Leit zesummen de **Kraizwee** gebied.
- Vu Gréngendondeg owends bis Karfreides owens waren mir och dëst Joer nees bei der Aktioun "**Getsemani**" ënnerwee fir de Jesus a senger schwéierster Stonn ze begleeden. Eng Nuetswanderung, eng Veillée am Bësch, Schlofen an engem klengen Chalet an gemeinsam schwéier Kierperlech Arbecht am Bësch sinn ëmmer nees eng Erfahrung, déi Gemeinschaft a Gebuergeheet (och am Vertrauen op Gott) erliewen léist.
- Ouschterméindeg waren d'Explorerecheffen zu Kalber mat den Dikkrecher Cheffen um Terrain an hun de Programm fir de Summercamp festgeluecht.
- Den 21ten Abrëll, zu Enn vun der Ouschtervakanz , hun mir eis mat enger starker Delegatioun un der **grousser Botz** an der Gemeng Duelem bedeelegt.
- Vum 5ten op de 6te Mee waren mir zesummen fir mam **Pélé des jeunes** d'Oktav anzelauden. No enger flotter Veillée an engem Nuetspill hun e puer Optimisten probéiert an der aller Schoul zu Fëlschdrëff ze schlofen. Fréih an der Nuecht sinn sie vun de Pio'en, déi vu Wies hier koumen ofgeholt ginn . Zesummen goug et an Staat, bei d'Bild vun der Tréischterin. (an duerno op de Märtchen).
- Freides den 11te Mee haten mir bei de Pionnéier eng Première. Zu Stadtbredimus huet de Boris ugefang eis **Badminton-unterricht** ze gin. Waat fir hien en Dingscht ass, bréngt eis aneren eng nei sportlech Kompetenz. Sou kommen mir all ,am mérite européen e Schrack virun. Affaire à suivre...
- Den 23ten a 24te Mee war nees eis traditionnel **Playback-show a Scoutskirmes**. Mat vereenten Kräften huet de ganze Grupp gehollef, datt och d'éditioun 2001 e grouss Succès gouf. Dank der tatkräfteger Hëllef vun de Pio'en, konnte mir souguer de Rallye beibehalen.
- De 27te Mee waren eis Wëllefcher zu Gréivemaacher mat beim **Wëllefches'rallye** derbei.
- Den 28te Mee hate mir en traurege Rendez-vous. Eiser Frëndin dem Laurence Beissel sei Papp gouf begruewen an mir hun mat enger grousser Delegatioun d'Laurence op deem battere Wee begleede wëllen.
- Vun no der Péngschtvakanz un louch Hektik an der Luucht. Een Deel vun de Scouten hun sêch nach séier, virum Camp, mat der Hëllef vun e puer gudde Mammen, e **Feiermantel** gebitzt. Während deem hun déi aner d'Zelter an d'Material fir de Camp präparéiert oder sinn op Remerschen schwammen gefuer.
- De 17te Juli, den Dag virum Camp hun mir mat fleissegem Hänn e Camion voll Holz a Scoutsmaterial gelueden. Dat ass nach deem Owend op Kalber bei de Bauer an d'Scheier komm. Et konnt lass go'en.
- Lo war alles bereet fir den **Avex-Summercamp**. Dëschdeg moies ass et lass gangen. Opwuel eenzel Leit den Départ verpasst haten, an et am Ufank Krämpes kascht huet, och bei de Cheffen, hun mir vum 18ten bis den 28te Juli um **Hau Kola** eng flott Zeit erliewt, an bestëmmt och nei Frënn fond. Mais mir waren och frouh, wéi nees all eis't Material zu Duelem louch a mir all gesond nees doheem waren.
- Mais och elo war d'Scoutssaison nach nëtt eriewer. Den 1ten August sinn d'Pio'en an Eistereich op den **Techuana** gefuer. Trotz internationaler Bedeelegung a grousser Opmaachung, war scheinbar den Haapt-thema "dolce far niente" wat op Dauer och nëtt zefridden mëscht, do hëllefen mol keng relax Bullen. Duerfir waren sie frouh wéi sie den 12 ten August, brong-gebrannt a blond-gebleecht nees zu Duelem ukomm waren. Lo konnt de Rido falen. D'Akteuren op der Duelemer Scoutsbühn haten sêch eng Paus verdéngt.